

摩

訶

止

觀

摩訶止觀卷第四上

天台智者大師說

△第六明方便者方便名善巧善巧修行以微少善根能令無量行成解發入菩薩位大論云能以少施少戒出過聲聞辟支佛上卽此義也又方便者衆緣和合也以能和合成因亦能和合取果大品經言如來身者不從一因一緣生從無量功德生如來身顯此巧能故論方便若依漸次卽有四種方便方便各有遠近如阿毗曇明五停心爲遠四善根爲近通別方便例可意知圓教以假名五品觀行等位去真猶遙名遠方便六根清淨相似鄰真名近方便今就五

品之前假名位中復論遠近二十五法爲遠方便十種境界爲近方便橫豎該羅十觀具足成觀行位能發真似名近方便今釋遠方便略爲五一具五緣二呵五欲三棄五蓋四調五事五行五法夫道不孤運弘之在人人弘勝法假緣進道所以須具五緣緣力旣具當割諸嗜欲嗜欲外屏當內淨其心其心若寂當調試五事五事調已行於五法必至所在譬如陶師若欲得器先擇良處無砂無鹵草水豐便可立作所次息餘際務際務不靜安得就功雖息外緣身內有疾云何執作身雖康壯泥輪不調不成器物上緣雖整不專於業廢不相續永無辦理止觀五緣亦復

如是有待之身必假資藉如彼好處呵狀塵欲如斷
外緣棄絕五蓋如治內疾調適五事如學輪繩行於
五法如作不廢世間淺事非緣不合何況出世之道
若無弄引何易可階故歷二十五法約事爲觀調麤
入細檢散令靜故爲止觀遠方便也此五法三科出
大論一種出禪經一是諸禪師立一具五緣者一持
戒清淨二衣食具足三閑居靜處四息諸緣務五得
善知識禪經云四緣雖具足開導由良師故用五法
爲入道梯凳一闕則妨事釋此具如次第禪門○此
中明持戒清淨卽四意一列戒名二明持戒三明犯
戒四明懺淨列名者經論出處甚多且依釋論有十

種戒所謂不缺不破不穿不雜隨道無著智所讚自
在隨定具足此十通用性戒爲根本大論云性戒者
是尸羅身口等八種謂身三口四更加不飲酒是淨
命防意地又云十善是尸羅佛不出世世常有之故
名舊戒佛不出世凡夫亦修八禪故名舊定外道邪
見六十二等舊醫乳藥名爲舊慧常途云無客定無
漏導八禪耳今難此語亦應無漏導十善也戒慧旣
有客法定何獨無今用三歸五戒二百五十爲客戒
根本十種得戒人者如佛自言善來比丘自然已得
具足戒如摩訶迦葉自誓因緣得具足戒如憍陳如
見諦故受具足戒如波闍波提比丘尼以八敬法受

具足戒如達磨提那比丘尼遣信受具足戒如須陀
耶沙彌論義受具足戒如耶舍比丘等善來受具足
戒如跋陀羅波楞伽加三歸受具足戒如邊地第五
律師受具足戒中國十人白四羯磨受具足戒客戒
人也根本淨禪觀練薰修爲客定四諦慧爲客慧佛
出方有也性戒者莫問受與不受犯卽是罪受與不
受持卽是善若受戒持生福犯獲罪不受無福不受
犯無罪如伐草害畜罪同對首懺二罪俱滅大論解
云違無作罪同滅耳而償命猶在故知受得之戒與
性戒有異也故四分問遮法云不犯邊罪不邊罪卽
性罪也此罪障優婆塞戒何況大戒若性戒清淨是

戒度根本解脫初因因此性戒得有無作受得之戒
小乘明義無作戒卽是第三聚大乘中法鼓經但明
色心無第三聚心無盡故戒亦無盡若就律儀戒論
無作可解定共戒無作者與定俱發有人言入定時
有出定時無有人言無作依定定在不失定退卽謝
也道共戒無作者此無作依道道無失故此戒亦無
失戒定道共通是戒名說通以性戒爲本故經云依
因此戒能生禪定及滅苦智慧卽此意也○二明持
者此十種戒攝一切戒不缺戒者卽是持於性戒乃
至四重清淨守護如愛明珠若毀犯者如器已缺無
所堪用佛法邊人非沙門釋子失比丘法故稱爲缺

不破者卽是持於十三無有破損故名不破若毀犯者如器破裂也不穿者是持波夜提等也若有毀犯如器穿漏不能受道故名爲穿不雜者持定共戒也雖持律儀念破戒事名之爲雜定共持心欲念不起故名不雜如大經云雖不與彼女人身合而共言語嘲調壁外釧聲見男女相追皆汗淨戒十住婆沙云雖制其事而令女人洗拭按摩染心共語相視或限爾許日持戒或期後世富樂天上自恣皆名不淨若持不雜戒悉無此等念也隨道者隨順諦理能破見惑無著戒者卽是見真成聖於思惟惑無所染著也以此兩戒約真諦持戒也智所讚戒自在戒則約菩

薩化他爲佛所讚於世間中而得自在是約俗諦論持戒也隨定具足兩戒卽是隨首楞嚴定不起滅定現諸威儀示十法界像導利衆生雖威儀起動而任運常靜故名隨定戒前來諸戒律儀防止故名不具足中道之戒無戒不備故名具足此是持中道第一義諦戒也用中道慧偏入諸法故經云式义式义名大乘戒也涅槃明五支戒及十種戒義勢略同設諸經論更明戒相終不出此十科束前三種戒名律儀戒兼善防惡從初根本乃至不穿纖毫清淨束名律儀戒凡夫散心悉能持得此戒也次不雜一戒定法持心心不妄動身口亦寂三業皎鏡此是定共戒入

定時任運無雜出定身口柔輒亦不雜凡夫入定則能持得也隨道戒初果見諦發真成聖聖人所持非凡夫能持也無著戒則三果人所持亦非初果所持也智讚自在此乃菩薩利他須持此戒則非二乘所持也隨定具足此是大根性所持則非六度通教菩薩所能持也況復凡夫二乘耶向判位高下事義不同理觀觀心論持戒者具能持得上十戒也先束十戒爲四意前四戒但是因緣所生法通爲觀境次二戒卽是觀因緣生法卽空空觀持戒也次兩戒觀因緣卽是假假觀持戒也次兩戒觀因緣生法卽是中觀持戒也所言觀心爲因緣生法者若觀一念心

從惡緣起卽能破根本乃至破不雜戒與善相違故名爲惡今以善順之心防止惡心能令根本乃至不雜等戒善順成就得無毀損故稱善心名爲防惡心既止身口亦然防卽是止善順卽是行善行善卽是觀止善卽是止是名觀因緣所生心持四種戒也次觀善惡因緣所生心卽空者如金剛般若云若見法相者名著我人衆生壽者若見非法相者亦著我人衆生壽者不見法相不見非法相如筏喻者法尚應捨何況非法故知法與非法二皆空寂乃名持戒今云法者祇善惡兩心假實之法也若見有善惡假名卽是著我人衆生壽者若見善惡實法亦是著我

人衆生壽者所言非法相者若見善惡假名是無者亦是著我人衆生壽者若見善惡實法は無者亦著我人衆生壽者何以故依無起見故不應著乃至依非有非無起見皆名著我人衆生壽者觀如是等法與非法皆卽是空由此觀故能順無漏防止有無六十二見故名隨道戒若重慮此觀思惟純熟歷緣對境於一切色聲皆悉卽空名無著戒防止思惑善順真諦是名觀因緣心卽空持二種戒也次觀因緣心卽是假者知心非心法亦非法而不永滯非心非法以道種方便無所有中立心立法拔出諸心數法導利衆生爲智所讚雖廣分別無量心法但有名字如

虛空相不生愛著惑相不拘名爲自在如此假觀防
止無知善順俗理防邊論止順邊論觀卽是假觀持
兩戒也次觀因緣生心卽中者觀於心性畢竟寂滅
心本非空亦復非假非假故非世間非空故非出世
間非賢聖法非凡夫法二邊寂靜名爲心性能如是
觀名爲上定心在此定卽首楞嚴本寂不動雙照二
諦現諸威儀隨如是定無不具足如是觀心防止二
邊無明諸惡善順中道一實之理防邊論止順邊論
觀此名卽中而持兩戒也故梵網云戒名大乘名第
一義光非青黃赤白戒名爲孝孝名爲順孝卽止善
順卽行善如此戒者本師所誦我亦如是誦當知中

道妙觀戒之正體上品清淨究竟持戒十住廣說云
若無我我所遠離諸戲論一切無所有是名上尸羅
故淨名云罪性不在內亦不在外亦不在兩中間如
其心然罪垢亦然其能如是是名善解是名奉律卽
此意也復次觀心持戒卽是五名所以者何防止是
戒義觀亦如是三觀名能防三惑名所防如此防止
義徧法界不局在身口云又毗尼名滅滅身口諸非
故今觀心亦名爲滅卽空之觀能滅見思之非卽假
觀能滅塵沙之非卽中觀能滅無明之非如此論滅
徧滅法界諸非不止七支故淨名云當直除滅勿擾
其心卽此意也又波羅提木叉名保得解脫者觀心

亦爾若不觀三諦之理三惑保不解脫若見三諦三惑保脫如此解脫徧法界脫非止解脫三途及出生死而已又誦者背文闇持也今觀心亦爾三觀之名詮三諦理卽是其文知名非名研心諦理觀法相續常自現前不生妄念名之爲誦如此誦者徧法界誦非止八十誦也又律者詮量輕重分別犯非犯觀心亦爾分別見思麤惡滓重界內無知小輕塵沙客塵橫起復爲小重根本微細如上菩提心中已說三觀觀三理是不犯三惑障三理名爲犯三藥治三病詮量無謬纖毫不差又知持事戒有三品上品得天報中品得人報下品得修羅報犯上退天犯中退人犯

下退修羅入三惡道惡道又三品輕者入餓鬼道次者入畜生道重者入地獄道中品又多種上中下下下卽四天下也上品又多種謂三界諸天各有品秩也又持理戒空假中三品各有上中下卽空三品者下品爲聲聞中品爲緣覺上品爲通教菩薩退則傳傳失也卽假三品者下品爲三藏菩薩中品爲通教出假菩薩上品爲別教菩薩卽中三品者下品爲別教菩薩中品圓教菩薩上品是佛唯佛一人具淨戒也又下品爲五品中爲六根清淨上入初住此略就觀心判其階差中道觀心卽是法界摩訶衍徧攝一切法可以意得不復煩文也私諮云下中三品皆約

發真上品何意約真似爲三品耶答前三道未合可得分張橫辨卽中旣融宜約一道豎判又亦得約橫者別接通別圓三品云如此分別得失輕重徧詮量法界豈止煮燒覆障耶觀心五名宛然可見若事中恭謹精持四戒而其心雜念事亦不牢猶如坯餅遇愛見惡則便破壞若能觀心六種持戒理觀分明妄念不動設遇惡緣堅固不失理旣不動事任運成故淨名云其能如是是名善解是名奉律正意在此也三明犯戒相者夫毀滅淨戒不出癡愛倒見是戒怨家喻二羅刹大經云譬如有人帶持浮囊渡於大海爾時海中有一羅刹來乞浮囊初則全乞乃至微塵

悉皆不與行人亦爾發心秉戒誓渡生死大海愛見
羅刹乞戒浮囊愛羅刹言令汝安隱得入涅槃者此
以欲樂暢情稱爲涅槃如飢得食如貧得寶獼猴得
酒則得安樂安樂名涅槃誘誑行人若隨愛轉毀破
四重是全棄浮囊是名犯相若愛心雖起不可全棄
何者我今欲過生死大海尸羅不淨還墮三途禪定
智慧皆不得發思惟是已生大怖畏故言汝寧殺我
浮囊叵得是名持相愛心復起摩觸快意若隨愛觸
是棄半浮囊是名犯相行人復念禁戒豈可輸半論
其果報地獄苦惱論其卽目下意治擯甚可羞恥豈
應如此損毀大事是故護惜不隨愛情是名持相愛

心又起乞重方便若毀犯者是乞手許又毀波夜提
是乞指許又毀吉羅是乞微塵許吉羅雖小開放途
門微塵不多水當漸入沒海而死是爲愛心破律儀
戒貪攀覽五欲破定共戒深著生死爲有造業破卽
空戒不息世譏嫌無護他意破卽假戒不信戒善與
虛空等不信此戒具足佛法不信此戒畢竟清淨破
中道戒此例可解云次見羅刹乞浮囊者若爲財色
而毀戒者如前所說觸人皆爾此名已起之惡爲除
斷故一心勤精進若見心猛利於所計法而起罪過
此是解僻名未生之惡爲不生故一心勤精進此見
雖未起若修得少禪無好師友卽生念著而起過患

佛在世一比丘得四禪謂爲四果臨終見中陰起卽
謗佛云羅漢不生今那得生阿難問佛此人命過今
生何處佛言已墮地獄雖持戒得有漏禪是亦不可
信佛在世尚爾況末代癡人罪著深重故大虛空藏
經云若起惡見名第三波羅夷云何惡見或得空解
發少智慧師心自樹謂證無生見心旣強能破諸法
無佛無衆生撥世因果出世因果 法華云或食人
肉或復噉狗卽此義也破正見虜儀淨命起於平等
無分別見何者有罪何者非罪若有分別分別卽礙
礙卽非真於貪欲中莫生怖礙無怖礙卽是菩提謂
此是實餘皆妄語又值惡師爲說惡法見毒轉熾邪

鬼入心邪解更甚猖狂顛倒無種不爲見慢我差陵
筏一切見行善者謂有所得欺之如土由是見故淨
囊全去設不全去者卽思惟言理雖如此我未能見
何容頓棄惜猶不與見心復起一切法空豈有觸與
不觸男女等相卽便把執歛抱是名半去或重方便
乃至吉羅謂諸法空寂何用事相紛紜旣不存微塵
空心轉盛如小水漸漏無礙稍滑一切戒律皆悉吞
噉故淨囊永沒當知見心大可怖畏何以故若謂四
重及犯者皆空而五逆亦空何不造逆空見旣強亦
無父母若通若害皆不爲礙旣無礙者亦應不礙王
及夫人論其見心實不謂有王及夫人而自於已惜

身惜命若侵國王身碎命盡如此癡空不空身命惜
已身命亦於王不空旣於已於王不能空者那得獨
欺父母輕忽佛教而言四重五逆皆空耶當知此人
不能自見執空之過近尚不見何況遠耶旣以惡空
撥佛禁法是破律儀戒空見擾心破定共戒堅執已
見是破卽空戒汙他善心破卽假戒不信見心與虛
空等卽是佛法畢竟清淨破卽中戒當知邪僻空心
甚可怖畏若墮此見長淪永沒尚不能得人天涅槃
何況大般涅槃故論云大聖說空法本爲治於有若
有著空者諸佛所不化又經云若於諸法生疑心者
能破煩惱如須彌山若定起見則不可化無行經云

貪欲卽是道僻取此語以證無礙何不引無行貪著
無礙法是人去佛遠若有得空者終不破於戒云是
名見心羅刹毀禁戒也大意如此云復次前一向論
持次一向論犯今明十戒持犯不定若通論動出悉
名爲乘故有人天等五乘通論防止悉名爲戒故有
律儀定共道共等戒若就別義事戒三品名之爲戒
戒卽有漏不動不出理戒三品名之爲乘乘是無漏
能動能出約此乘戒四句分別一乘戒俱急二乘急
戒緩三戒急乘緩四乘戒俱緩一乘戒俱急者如前
持相十種清淨事理無瑕觀念相續今生卽應得道
若未得道此業最強強者先牽必升善處若律儀戒

急則爲欲界人天所牽若無雜戒急隨禪梵世三品
理乘何乘最急若三品卽中乘急以人天身值彌勒
佛聞華嚴教利根得道若上品出假乘急以人天身
值彌勒佛於華嚴座作鈍根得道若上中二品入空
乘急以人天身值彌勒佛聞方等般若等教得三乘
等道若下品入空乘急以人天身值彌勒佛聞三藏
經得道得人天身是持事戒力見佛得道修乘觀力
事理俱持諸行中最故不可緩也二戒緩乘急者是
人德薄垢重煩惱所使是諸事戒皆爲羅刹毀食專
守理戒觀行相續如上覺意六蔽中用心失掘示爲
其相以事戒緩命終故墮三惡道受於罪報於諸乘

中何乘最強強者先牽若析空乘強以三途身值彌勒佛聞三藏經乃可得道若卽空乘急以三途身值彌勒佛聞般若方等得道若卽假乘急以三途身值彌勒佛聞華嚴及聞餘教作鈍根得道若卽中乘急以三途身值彌勒佛聞華嚴經作利根得道是故佛說漸頓諸經龍鬼畜獸悉來會坐卽是其事破事戒故受三惡身持理觀故見佛得道大經云於戒緩者不名爲緩於乘緩者乃名爲緩正是此一句也三戒急乘緩者事戒嚴急纖毫不犯三種觀心了不開解以戒急故人天受生或隨禪梵世耽湏定樂世雖有佛說法度人而於其等全無利益設得值遇不能開

解振卅一國不覺不知舍衛三億不聞不見著樂諸
天及生難處不來聽受是此意也譬如繫人或以財
物求諸大力申延日月冀逢恩赦在人天中亦復如
是冀善知識化導修乘卽能得脫若於人天不修乘
者果報若盡還墮三途百千佛出終不得道四事理
俱緩者如前十種皆犯永墜泥黎失人天果報神明
昏塞無得道期迴轉沈淪不可度脫行者當自觀心
事理兩戒何戒緩急於事三品何品最強於理三品
何品小弱自知深淺亦識將來果報善惡旣自知已
亦知他人將此觀心亦識諸經列衆之意亦識如來
逗緣大小故華嚴中鬼神皆言住不思議解脫法門

者此是權來引實令昔修不思議乘急者得道涅槃
列衆亦復如是若細尋此意廣歷四教乘戒緩急以
辨其因後歷五味以明其果皆使分明凡如是等因
果差降升沉非一云何難言理戒得道何用事戒耶
幸於人天受道何意苦入三途四明懺淨者事理二
犯俱障止觀定慧不發云何懺悔令罪消滅不障止
觀耶若犯事中輕過律文皆有懺法懺法若成悉名
清淨戒淨障轉止觀易明若犯重者佛法死人小乘
無懺法若依大乘許其懺悔如上四種三昧中說下
當更明次理觀小僻不當諦者此人執心若薄不苟
封滯但用正觀心破其見著慙愧有羞低頭自責策

心正轍罪障可消能發止觀也見若重者還於觀心中修懺下當說也若犯事中重罪依四種三昧則有懺法普賢觀云端坐念實相是名第一懺妙勝定云四重五逆若除禪定餘無能救方等云三歸五戒乃至二百五十戒如是懺悔若不還生無有是處請觀音云破梵行人作十惡業蕩除糞穢還得清淨故知大乘許悔斯罪罪從重緣生還從重心懺悔可得相治無殷重心徒懺無益障若不滅止觀不明若人現起重罪苦到懺悔則易除滅何以故如迷路近故過去重障必難迴轉迷深遠故若欲懺悔二世重障行四種三昧者當識順流十心明知過失當運逆流十

心以爲對治此二十心通爲諸懺之本順流十心者
一自從無始闇識昏迷煩惱所醉妄計人我計人我
故起於身見身見故妄想顛倒顛倒故起貪瞋癡癡
故廣造諸業業則流轉生死二者內具煩惱外值惡
友扇動邪法勸惑我心倍加隆盛三者內外惡緣旣
具能內滅善心外滅善事又於他善都無隨喜四者
縱恣三業無惡不爲五者事雖不廣惡心徧布六者
惡心相續晝夜不斷七者覆諱過失不欲人知八者
魯扈底突不畏惡道九者無慙無愧十者撥無因果
作一闡提是爲十種順生死流昏倒造惡廁蟲樂廁
不覺不知積集重累不可稱計四重五逆極至闡提

生死浩然而無際畔今欲懺悔應當逆此罪流用十
種心翻除惡法先正信因果決定孱然業種雖久久
不敗亡終無自作他人受果精識善惡不生疑惑是
爲深信翻破一闡提心二者自愧尅責鄙極罪人無
羞無恥習畜生法棄捨白淨第一莊嚴咄哉無鉤造
斯重罪天見我屏罪是故慙天人知我顯罪是故愧
人以此翻破無慙無愧心三者怖畏惡道人命無常
一息不追千載長徃幽途繇邈無有資糧苦海悠深
舩棧安寄賢聖呵棄無所恃怙年事稍去風刀不著
豈可晏然坐待酸痛譬如野干失耳尾牙詐眠望脫
忽聞斷頭心大驚怖遭生老病尚不爲急死事弗著

那得不怖怖心起時如履湯火五塵六欲不暇貪染
如阿輪柯王聞旃陀羅朝朝振鈴一日已盡六日當
死雖有五欲無一念愛行者怖畏苦到懺悔不惜身
命如彼野干決絕無所思念如彼怖王以此翻破不
畏惡道心四者當發露莫覆瑕疪賊毒惡草急須除
之根露條枯源乾流竭若覆藏罪是不良人迦葉頭
陀令大衆中發露方等令向一人發露其餘行法但
以實心向佛像改革如陰隱有癰覆諱不治則死以
此翻破覆藏罪心也五斷相續心者若決果斷莫畢
故不造新乃是懺悔懺已更作者如王法初犯得原
更作則重初入道場罪則易滅更作難除已能吐之

云何更取以此翻破常念惡事心六發菩提心者昔
自安危人徧惱一切境今廣起兼濟徧虛空界利益
於他用此翻破徧一切處起惡心也七修功補過者
昔三業作罪不計晝夜今善身口意策勵不休非移
山岳安填江海以此翻破縱恣三業心八守護正法
者昔自滅善亦滅他善不自隨喜亦不喜他今守護
諸善方便增廣不令斷絕譬如全城之勲勝鬘云守
護正法攝受正法最爲第一此翻破無隨喜心九念
十方佛者昔親狎惡友信受其言今念十方佛念無
礙慈作不請友念無礙智作大導師翻破順惡友心
十觀罪性空者了達貪欲瞋癡之心皆是寂靜門何

以故貪瞋若起在何處住知此貪瞋住於妄念妄念
住於顛倒顛倒住於身見身見住於我見我見則無
住處十方諦求我不可得我心自空罪福無主深達
罪福相徧照於十方令此空慧與心相應譬如日出
時朝露一時失一切諸心皆是寂靜門示寂靜故此
翻破無明昏闇是爲十種懺悔順涅槃道逆生死流
能滅四重五逆之過若不解此十心全不識是非云
何懺悔設入道場徒爲苦行終無大益涅槃云若言
勤修苦行是大涅槃近因緣者無有是處卽此意也
是名懺悔事中重罪也次懺見罪者以見惑故順生
死流如前所說向運十心附事爲懺懺鈍使罪今扶

理懺見懺利使罪然見心猛威起重煩惱應傍用事
助如服下藥須加巴豆令蕕瀉盡底是故還約十法
以明懺見一翻破不信者卽點身見心令識無明苦
集如鬱頭藍弗得非想定世人崇之如佛不識苦集
報盡還墮須跋陀羅得非想定雖無麓想有細煩惱
長爪利智而受不受高著外道尚未出見非是涅槃
況麓淺者尚不逮藍弗而言是真道豈非大僻是人
愛著觀空智慧是事不知名爲無明而起違從依見
造行見行依色卽是名色名色卽是苦等迷苦起於
愛有有生未來生死流轉相續豈是寂滅若謂生死
盡者乃是漫語呼無明見心爲道非道爲道非因計

因名爲戒取豈非因盜呼未來三途苦報爲涅槃此
是見取非果計果是爲果盜身邊邪見其事可知如
此見心乃是苦集非滅道也尚非三藏道滅豈是摩
訶行道滅若能如是卽知世間因果復識出世因果
故大品云般若能示世間相所謂示是道非道是爲
深識見心苦集也又深者非但知無明苦集亦識三
藏因果亦識因緣生法卽空四諦因果又復深者亦
知因緣卽假無量四諦因果又復深者亦知因緣卽
中無作四諦因果於一見心具識一切因果故大經
云於一念心悉能稱量無量生死是名不可思議故
名深信破不信也二生重慙愧者不見我心中三諦

之理名慙愧且約理觀論人天者慙乾慧性地之人愧四果淨天三十心人十地義天五品六根清淨之人四十二位天例如作意得報名爲人自然果報名爲天二種天人亦復如是方便道名爲人真理顯名爲天見心造罪覆三諦理不逮三種人天是故慙愧翻破無慙愧心也三怖畏者知見心造罪此過深重大論云諸佛說空義爲離諸見故若復見有空諸佛所不化我今由見而起大罪此間劫盡他方獄生此閒劫成還來此處如是展轉無量無邊若說果報所受之身當吐熱血死故知見罪大重旣非無漏不出生死煩惱潤業墮落何疑一命不追永無出日爲是

義故生大怖畏翻破不畏惡道心也四發露者從來
諸見而生愛著覆此三諦不能決定生信今知見過
失發卻三疑無所隱諱顯其諦性是爲發露翻破覆
藏罪心也五斷相續心者三諦之觀勿令有閒以入
正道治三惑心斷而不習此翻破相續惡心也六發
菩提心者卽是緣三諦理皆如虛空空則無邊愍傷
一切普令度脫昔迷此起惑有無邊故罪亦無邊今
菩提心徧於法界起無作善亦徧法界翻破昔徧空
無作惡也奏師子琴餘弦斷絕卽此義也七修功補
過者三諦道品卽是菩薩寶炬陀羅尼是行道法趣
涅槃門如此道品念念相續卽是修功補過昔執於

見謂爲涅槃於見不動不修道品設令動有入無如
屈步蟲雖於見動亦不能修道品今知有無是見不
執爲實是名見動而不修道品若破析諸見行於道
品是名見動而修道品又體見卽空卽假卽中旣言
卽者於見不動而修三種道品是爲修功補於縱見
之過也八守護正法者昔護見不令他破方便申通
今護三諦諸空不令見破若有留滯善巧申弘亡身
存法猶如父母守護其子此翻破毀善事也九念十
方佛者昔服見毒常無厭足如渴思飲又遇惡師如
加以鹹水以苦捨苦我慢矜高諂心不實於千萬億
劫不聞佛名字今念三諦不來不去卽是佛無生法

卽是佛常爲諦理所護此翻破狎惡友心十觀罪性
空者此三種惑本來寂靜而我不了妄謂是非如熱
病人見諸龍鬼今觀見如幻如化來無所從去無足
跡亦復不至東西南北一切罪福亦復如是一空一
切空空卽罪性罪性卽空此翻破顛倒心也運此十
懺時深觀三諦又加事法以殷重心不惜身命名第
二健兒是名事理兩懺障道罪滅尸羅清淨三昧現
前止觀開發事戒淨故根本三昧現前世智他心智
開發無生戒淨故真諦三昧現前一切智開發卽假
戒淨故俗諦三昧現前道種智開發卽中戒淨故王
三昧現前一切種智開發得此三諦三昧故名王三

昧一切三昧悉入其中又能出生一切諸定無不具足故名爲止又能具足一切諸智故名爲觀故知持戒清淨懇惻懺悔俱爲止觀初緣意在此也○第二衣食具足者衣以蔽形遮障醜陋食以支命填彼飢瘡身安道隆道隆則本立形命及道賴此衣食故云如來食已得阿耨三菩提此雖小緣能辦大事裸餒不安道法焉在故須衣食具足也衣者遮醜陋遮寒熱遮蚊蟲飾身體衣有三種雪山大士絕形深澗不涉人間結草爲席被鹿皮衣無受持說淨等事堪忍力成不須溫厚不遊人閒無煩支助此上人也十二頭陀但畜三衣不多不少出聚入山被服齊整故立

三衣此中士也多寒國土聽百一助身要當說淨趣
足供事無得多求多求辛苦守護又苦妨亂自行復
擾檀越少有所得即便知足下士也觀行爲衣者大
經云汝等比丘雖服袈裟心猶未染大乘法服如法
華云著如來衣如來衣者柔和忍辱心是此卽寂滅
忍生死涅槃二邊麤穢與中道理不二不異故名柔
和安心中道故名爲忍離二喧故名寂過二死故名
滅寂滅忍心覆二邊惡名遮醜衣除五住故名障熱
破無明見名爲遮寒無生死動亦無空亂意捨二覺
觀名遮蚊蟲此忍具一切法如鏡有像瓦礫不現中
具諸相但空則無故云深達罪福相徧照於十方微

妙淨法身具相三十二用莊嚴法身寂忍一觀具足
衆德亦名爲衣亦名嚴飾非九七五割截所成也三
衣者卽三觀也蔽三諦上醜遮三諦上見愛寒熱卻
三覺蚊蟲莊嚴三身故以三觀爲衣卽是伏忍柔順
忍無生寂滅忍也又起見名寒起愛名熱修止觀得
見諦解如煖見則不生得思惟解如涼愛則不生五
根無惡卽福德莊嚴意地無惡卽智慧莊嚴餘二觀
上衣例可解百一長衣者卽是一切行行助道之法
助成三觀共蔽諸惑嚴於三身此是歷諸法修忍爲
衣也食者三處論食可以資身養道一深山絕跡去
遠人民但資甘果美水一菜一果而已或餌松栢以

續精氣如雪山甘香藕等食已繫心思惟坐禪更無
餘事如是食者上士也二阿蘭若處頭陀抖擻絕放
牧聲是修道處分衛自資七佛皆明乞食法方等般
舟法華皆云乞食也路徑若遠分衛勞妨若近人物
相喧不遠不近乞食便易是中士也三旣不能絕穀
餌果又不能頭陀乞食外護檀越送食供養亦可得
受又僧中如法結淨食亦可得受下士也若就觀心
明食者大經云汝等比丘雖行乞食而未曾得大乘
法食法食者如來法喜禪悅也此之法喜卽是平等
大悲觀一切法無有障礙淨名云於食等者於法亦
等於法等者於食亦等煩惱爲薪智慧爲火以是因

緣成涅槃食令諸弟子悉皆甘嗜此食資法身增智
慧命如食乳糜更無所須卽真解脫真解脫者卽是
如來用此法喜禪悅歷一切法無不一味一色一香
無非中道中道之法具一切法卽是飽義無所須義
如彼深山上士一草一果資身卽足頭陀乞食者行
人不能卽事而中修實相慧者當次第三觀調心而
入中道次第觀故名爲乞食亦見中道又名飽義卽
中士也檀越送食者若人不能卽事通達又不能歷
法作觀自無食義應須隨善知識能說般若者善爲
分別隨聞得解而見中道是人根鈍從聞生解名爲
得食如人不能如上兩事聽他送食又僧中結淨食

者卽是證得禪定支林功德藉定得悟名僧中食也
是故行者常當存念大乘法食不念餘味也

摩訶止觀卷第四上

摩訶止觀卷第四下

天台智者大師說

○第三閑居靜處者雖具衣食住處云何若隨自意
觸處可安三種三昧必須好處好處有三一深山遠
谷二頭陀抖擻三蘭若伽藍若深山遠谷途路艱險
永絕人蹤誰相惱亂恣意禪觀念念在道毀譽不起
是處最勝二頭陀抖擻極近三里交往亦踈覺策煩
惱是處爲次三蘭若伽藍閑靜之寺獨處一房不干
事物閉門靜坐正諦思惟是處爲下若離三處餘則
不可白衣齋邑此招過來恥市邊閑寺復非所宜安
身入道必須選擇慎勿率爾若得好處不須數移

云云

觀心處者諦理是也中道之法幽遠深邃七種方便
絕跡不到名之爲深高廣不動名之爲幽遠離二邊
稱之爲靜不生不起稱之爲閑大品云若干由旬外
起聲聞心者此人身雖遠離心不遠離以憤鬧爲不
憤鬧非遠離也雖在城傍不起二乘心是名遠離卽
上品處也頭陀處者卽是出假之觀此觀與空相鄰
如蘭若與聚落並出假之觀安心俗諦分別藥病抖
擻無知淨道種智此次處也閑寺一房者卽從假入
空觀也寺本衆閑居處而能安靜一室假是踰塵能
卽假而空當知真諦亦是處也安三諦理是止觀處
實不遁影山林房隱密室云○第四息諸緣務者緣

務妨禪由來甚矣蘭若比丘去喧就靜云何營造緣
務壞蘭若行非所應也緣務有四一生活二人事三
伎能四學問一生活緣務者經紀生方觸途紛糾得
一失一喪道亂心若勤營衆事則隨自意攝非今所
論二人事者慶弔俯仰低昂造聘此往彼來來往不
絕況復衆人交絡擾攘追尋夫違親離師本求要道
更結三州還敦五郡意欲何之倒裳索領鑽火求冰
非所應也三伎能者醫方卜筮泥木彩畫碁書呪術
等是也皮文美角膏煎鐸毀已自害身况修出世之
道而當樹林招鳥腐氣來蠅豈不摧折汗辱乎四學
問者讀誦經論問荅勝負等是也領持記憶心勞志

倦言論往復水濁珠昏何暇更得修止觀耶此事漸
捨況前三務云觀心生活者愛是養業之法如冰潤
種因愛有憂因憂有畏若能斷愛名息生活緣務也
人事是業也業生三界往來五道以愛潤業處處受
生若無業者愛無所潤諸業雖有力不逐不作者不
作故生死則斷伎術者未得聖道不得修通虛妄之
法障於般若般若如虛空無戲論無文字若得般若
如得如意珠但一心修何遽忽忽用神通爲習學者
未得無生忍而修世智辯聰種種分別皆是瓦礫草
木非真實珠若能停住水則澄清下觀瑠璃安徐取
寶能知世間生滅法相種種行類何物不知以一切

種智知以佛眼見欲行大道不應從彼小徑中學也
○第五善知識者是大因緣所謂化導令得見佛阿
難說知識得道半因緣佛言不應爾具足全因緣知
識有三種一外護二同行三教授若深山絕域無所
資待不假外護若修三種三昧應仰勝緣夫外護者
不簡白黑但能營理所須莫見過莫觸惱莫稱歎莫
帆舉而致損壞如母養兒如虎銜子調和得所舊行
道人乃能爲耳是名外護二同行者行隨自意及安
樂行未必須伴方等般舟行法決須好伴更相策發
不眠不散日有其新切磋琢磨同心齊志如乘一船
互相敬重如視世尊是名同行三教授者能說般若

示道非道内外方便通塞妨障皆能決了善巧說法
示教利喜轉破人心於諸方便自能決了可得獨行
妨難未諳不宜捨也經言隨順善師學得見恆沙佛
是名教授觀心知識者大品云佛菩薩羅漢是善知
識六波羅蜜三十七品是善知識法性實際是善知
識若佛菩薩等威光覆育卽外護也六度道品是入
道之門卽同行也法性實際卽是諦理諸佛所師境
能發智卽教授也今各具三義一如佛威神覆護卽
是外護二諸佛聖人亦脫纓絡著弊垢衣執除糞器
和光利物豈非同行三諸佛菩薩一音演法開發化
導各令得解卽是教授此卽具二義也六度道品亦

具三義助道名護助助道發正道卽是外護正助合
故卽是同行依此正助不失規矩通入三解脫門卽
是教授法性亦具三義境是所師冥薰蜜益卽是外
護境智相應卽是同行未見理時如盲諦法顯時如
目智用無僻經言修我法者證乃自知心無實行何
用問爲卽教授也此則三三合九句就前爲十二句
前三次三是事知識餘六句是理知識若將麤約三
諦者入空觀時衆聖爲外護卽空道品爲同行真諦
爲教授亦具六事六理假中兩觀亦復如是三諦合
有三十六番十八事十八理若歷四悉檀卽有衆多
知識義也若能了此知識法門善財入法界意則可

解此等雖同是知識依華嚴云有善知識魔三昧魔
菩提心魔魔能使人捨善從惡又能化人墮二乘地
若然者羅漢之人但行真諦非善知識若取內秘外
現聲聞爲知識者菩薩亦作天龍引入實相何獨羅
漢此義則通無非知識今言魔者取實羅漢令人至
化城者卽非真善知識但是半字知識行半菩提道
損半煩惱奪與互明或知識或魔也別教若不得意
不會中道亦是知識魔也圓教三種方是真善知識
三昧菩提心例此可解云○第二呵五欲者謂色聲
香味觸十住毗婆沙云禁六情如繫狗鹿魚蛇獫鳥
狗樂聚落鹿樂山澤魚樂池沼蛇樂穴居獫樂深林

鳥樂依空六根樂六塵非是凡夫淺智弱志所能降
伏唯有智慧堅心正念乃能降伏總喻六根今私對
之眼貪色色有質像如聚落眼如狗也耳貪聲聲無
質像如空澤耳如鹿也鼻貪香如魚也舌引味如蛇
也身著觸如猿也心緣法如鳥也今除意但明於五
塵五塵非欲而其中有味能生行人須欲之心故言
五欲譬如陶師人客延請不得就功五欲亦爾常能
牽人入諸魔境雖具前緣攝心難立是故須呵色欲
者所謂亦白長短明眸善睐素頸翠眉皓齒丹脣乃
至依報紅黃朱紫諸珍寶物感動人心如禪門中所
說色害尤深令人狂醉生死根本良由此也如難陀

爲欲持戒雖得羅漢習氣尚多況復具縛者乎國
耽荒無度不顧宗廟社稷之重爲欲樂故身入怨國
此間上代亡國破家多從欲起赫赫宗周褒姒滅之
卽其事也經云衆生貪狼於財色坐之不得道觀經
云色使所使爲恩愛奴不得自在若能知色過患則
不爲所欺如是呵已色欲卽息緣想不生專心入定
聲欲者卽是嬌媚妖詞姪聲淙語絲竹弦管環釧鈴
珮等聲也香欲者卽是鬱茀氛氲蘭馨麝氣芬芳酷
烈郁毓之物及男女身分等香味欲者卽是酒肉珍
肴肥腴津賦甘甜酸辣蘇油鮮血等也觸欲者卽是
冷暖細滑輕重強軟名衣上服男女身分等此五過

患者色如熱金九執之則燒聲如毒塗鼓聞之必死
香如慙龍氣嗅之則病味如沸蜜湯舌則爛如蜜塗
刀舐之則傷觸如臥師子近之則齧此五欲者得之
無厭惡心轉熾如火益薪世世爲害劇於怨賊累劫
已來常相劫奪摧折色心今方禪寂復相惱亂深知
其過貪染休息事如具如禪門中云止代名僧詩云
遠之易爲士近之難爲情香味觸高志聲色喪軀齡
觀心呵五欲者如色欲中滋味無量謂常無常我
無我淨不淨苦樂空有世第一義皆是滋味故大論
云色中無味相凡夫不應著若謂色是常是見依色
若色無常亦常亦無常非常非無常是見皆依色乃

至非如去非不如去非邊非無邊等是見皆依於色
悉是諍競執謂是實戲論破智慧眼互相是非爲色
造業適有此有卽有生死如是觀者增長於欲非是
呵欲今觀色有無等六十二見皆依無明無明無常
生滅不住速朽之法念念磨滅無我無主寂滅涅槃
無明旣爾從無明生若有若無等悉皆無常寂滅涅槃
槃旣無主我誰實誰虛終不於色起生死業業謝果
亡是爲呵色入空而得解脫呵色旣爾餘四亦是
名三藏析法呵五欲也中論指此云不善滅戲論也
若摩訶衍呵色欲者體知諸見皆依無明無明卽空
諸見亦卽空故金剛般若云須陀洹者名爲入流實

不入流不入色聲香味觸故所以者何若有色可折
可名入色色卽是空無色可入故名不入旣無流可
入卽無業果是名善滅戲論呵色旣爾餘四亦然復
次呵色卽空者但入色空不能分別種種色相云何
能度一切衆生衆生於色起種種計卽是種種集招
種種苦苦集病多道滅之藥亦復無量若欲化他豈
可證空而不觀察是故知空非空從空入假恒沙佛
法悉令通達若不如此猶名受入色空今深呵色空
不受不入廣分別色雖復分別但有名字名字卽空
故稱爲假呵色旣爾餘四亦然又呵色二邊如大品
云色中無味相凡夫不應著色中無離相二乘不應

離破色無明有無等見是呵其味破其沈空是呵其
離若定有味不應有離若定有離不應有味味不定
故非味離不定故非離不著二邊卽是非味非離顯
色中道實相故釋論云二乘爲禪故呵色事不名波
羅蜜菩薩呵色卽見色實相見色實相卽是見禪實
相故名波羅蜜到色彼岸到色彼岸卽是見色中道
分別色者卽是見色俗卽色空者是見色真如是呵
色盡色源底成三諦三昧發三種智慧深呵於色爲
止觀方便其意在此呵色旣然餘四亦爾

◎第三

棄五蓋者所謂貪欲瞋恚睡眠掉悔疑通稱蓋者蓋
覆纏絆心神昏闇定慧不發故名爲蓋前呵五欲乃

是五根對現在五塵發五識今棄五蓋卽是五識轉
入意地追緣過去逆慮未來五塵等法爲心內大障
喻如陶師身中有疾不能執作蓋亦如是爲妨旣深
加之以棄如翦毒樹如檢偷賊不可留也大品云離
欲及惡法離欲者五欲也如前所呵惡法者五蓋也
宜須急棄此五蓋者其相云何貪欲蓋起追念昔時
所更五欲念淨潔色與眼作對憶可愛聲髣髴在耳
思悅意香開結使門想於美味甘液流口憶受諸觸
毛豎戰動貪如此等麤弊五欲思想計校心生醉惑
忘失正念或密作方便更望得之若未曾得亦復推
尋或當求覓心入塵境無有間念麤覺蓋禪禪何由

獲是名貪欲蓋相瞋恚蓋者追想是人惱我惱我親
稱歎我怨三世九惱怨對結恨心熱氣麤忿怒相續
百計伺候欲相中害危彼安身恣其毒忿暢情爲快
如此瞋火燒諸功德禪定支林豈得生長此卽瞋恚
蓋相也睡眠蓋者心神昏昏爲睡六識闇塞四支倚
放爲眠眠名增心數法烏闇沈塞密來覆人難可防
衛五情無識猶如死人但餘片息名爲小死若喜眠
者眠則滋多薩遮經云若人多睡眠懈怠妨有得未
得者不得已得者退失若欲得勝道除睡疑放逸精
進策諸念離惡功德集釋論云眠爲大闇無所見日
日欺誑奪人明亦如臨陣白刃間如其毒蛇同室居

如人被縛將去殺爾時云何安可眠眠之妨禪其過最重是爲睡眠蓋相掉悔者若覺觀偏起屬前蓋攝今覺觀等起偏緣諸法乍緣貪欲又想瞋恚及以邪癡炎炎不停卓卓無住乍起乍伏種種紛紜身無趣遊行口無益談笑是名爲掉掉而無悔則不成蓋以其掉故心地思惟謹慎不節云何乃作無益之事實爲可恥心中憂悔懊結繞心則成悔蓋蓋覆禪定不得開發若人懺悔改往自責其心而生憂悔若入禪定知過而已不應想著非但悔故而得免脫當修禪定清淨之法那得將悔縈心妨於大事故云悔已莫復憂不應常念著不應作而作應作而不作卽是此

意是名掉悔蓋相也疑蓋者此非見諦障理之疑乃是障定疑也疑有三種一疑自二疑師三疑法一疑自者謂我身底下必非道器是故疑身二疑師者此人身口不稱我懷何必能有深禪好慧師而事之將不悞我三疑法者所受之法何必中理三疑猶豫常在懷抱禪定不發設發永失此是疑蓋之相也五蓋病相如是棄法云何行者當自省察今我心中何病偏多若知病者應先治之若貪欲蓋重當用不淨觀棄之何以故向謂五欲爲淨愛著纏絲今觀不淨膿囊涕唾無一可欣厭惡心生如爲怨逐何有智者當樂是耶故知此觀治貪之藥此蓋若去心卽得安若

瞋恚蓋多當念慈心滅除恚火此火能燒二世功德
人不喜見毒害殘暴禽獸無異生死怨對累劫不息
卽世微恨後成大怨今修慈心棄捨此惡觀一切人
父母親想悉令得樂若不得樂我當勤心令得安樂
云何於彼而生怨對作是觀時瞋心卽息安心入禪
若睡蓋多者當勤精進策勵身心加意防擬思惟法
相分別選擇善惡之法勿令睡蓋得入又當選擇善
惡之心令生法喜心旣明淨睡蓋自除莫以睡眠因
緣失二世樂徒生徒死無一可獲如入寶山空手而
歸深可傷歎當好制心善巧防禦也杖屨具申腳起
星水洗若掉散者應用數息何以故此蓋甚利來時

不覺于久始知今用數息若數不成或時中忘卽知
已去覺已更數數相成就則覺觀被伏若不治之終
身被蓋若三疑在懷當作是念我身卽是大富盲兒
具足無上法身財寶煩惱所翳道眼未開要當修治
終不放捨又無量劫來習因何定豈可自疑失時失
利人身難得怖心難起莫以疑惑而自毀傷若疑師
者我今無智上聖大人皆求其法不取其人雪山從
鬼請偈天帝拜畜爲師大論云不以囊臭而棄其金
慢如高山雨水不停卑如江海萬川歸集我以法故
復應敬彼普超經云人人相見莫相平相智如如來
乃能平人身子云我從今去不敢復言是人入生死

是人入涅槃卽此意也常起恭敬三世如來師卽未
來諸佛云何生疑耶若疑法者我法眼未開未別是
非憑信而已佛法如海唯信能入法華云諸聲聞等
非已智分以信故入我之盲瞑復不信受更何所歸
長淪永溺不知出要和伽利云優波笈多教弟子上
樹云若心信法法則染心猶豫狐疑事同覆器問曰
五蓋悉障定不答解者不同或云無知是正障何者
禪是門戶詮次之法知無知相乖故疑眠蓋是也或
言散動是正障何者定散相乖故掉悔是也或言貪
瞋是正障何者禪是柔輭善法剛柔相乖故貪瞋是
也如是等各據不同今釋不然五蓋通是障而隨行

者強弱若人貪欲蓋多此蓋是正障餘者是傍四蓋亦爾譬如四大通皆是病未必俱發隨其動者正能殺人蓋亦應爾先治於強弱者自去禪定得發云十住毗婆沙云若人放逸者諸蓋則覆心生天猶尚難何況於得果若人勤精進則能裂諸蓋諸蓋既裂已諸願悉皆得是名依事法棄蓋也問初禪發時五蓋畢竟盡不答此當分別何者離三毒爲四分貪瞋癡偏發是三分不名爲等三分等起名爲等三毒偏起是覺觀而非多三分等起名覺觀多卽是第四分也成論呼此爲剎那心剎那心旣通緣三毒三毒等起故知剎那之心卽是善惡成也阿毗曇明此剎那心

起但是無明無記善惡未成何以故雖通緣三毒不正屬三毒既不正屬那得是善惡雖非是惡三毒因之而起呼此無記爲因等起而不名爲善惡此二論雖異同是明第四分也離此四分爲五蓋貪瞋兩分是兩蓋開癡分爲睡疑兩蓋等分爲掉悔蓋若廣開四分一分則有二萬一千煩惱四分合有八萬四千約於苦諦則是八萬四千法藏約於集諦則是八萬四千塵勞門約於道諦則是八萬四千三昧陀羅尼等約於滅諦則是八萬四千諸波羅蜜四分法相該深若此五蓋理應高廣阿毗曇那得判貪止欲界上地名愛上亦無瞋此義已爲成論所難若上地輕貪

名愛亦應輕瞋名悲耶故知覆相抑異未是通方耳
今釋五蓋望於四分通至佛地上棄五蓋相此是鈍
使五蓋止障初禪初禪若發此蓋棄蓋常途所論祇
是此意利使五蓋障於真諦如前所明空見之人計
所執爲實餘是妄語乖之則瞋順之則愛卽貪瞋兩
蓋也無明闇心謬有所執非明審知卽睡眠蓋種種
戲論見諍無益卽掉悔蓋卽雖無疑後方大疑何以
故旣執是實何所復疑後若被破心生疑惑此五覆
心終不見諦呵棄此蓋蓋去道發證須陀洹從初果
去取真爲愛捨思爲瞋思惑未盡爲睡失脫妄念爲
掉非無學名疑故知五蓋障真通至三果除此五蓋

卽是無學復次依空起蓋障俗諦理所以者何沈空
取證以空爲是譬如貧人得少便爲足更不願好者
保愛此空卽貪蓋憎厭生死捨而不觀卽瞋蓋無爲
空寂不肯照假乃至不識五種之鹽名睡蓋空亂意
衆生非其境界名掉悔蓋假智不明名疑蓋此蓋不
棄道種智俗諦三昧終不現前此蓋若除法眼明朗
復次依中起蓋障於中道所以者何菩薩貪求佛法
如海吞流無有厭足生名愛法起順道貪此名貪蓋
不喜二乘大樹折枝不宿怨鳥是名瞋蓋無明長遠
設使上地猶有分在大論云處處說破無明三昧者
初雖破後更須破無智慧明卽睡蓋菩薩三業雖無

失此佛猶有漏失名掉悔蓋初後理圓而初心智慧
不逮於後是名疑蓋此蓋不棄終不與實相相應此
蓋若除真如理顯開佛知見此五蓋法不局在初心
地地皆有唯佛竟究八萬四千波羅蜜具足圓滿到
於彼岸故地持云第九離一切見清淨淨禪若得此
意蓋相則長非但欲界而已復次言語分別遷迤階
梯前鈍利兩蓋是凡夫時所棄俗諦上蓋是二乘時
所棄障中道蓋是菩薩時所棄如此論蓋後不關初
地攝二論師多明此意果頭之法不關凡夫那可卽
事而修圓釋不爾何以得知若爲上地人說應作法
性佛現法性國爲法性菩薩說之何意相輔現此三

界爲欲度此凡俗故論此妙法使其得修若言不爾爲誰施權權何所引若得此意初心凡夫能於一念圓棄諸蓋故大品云一切法趣欲事是趣不過欲事尚不可得何況當有趣不趣釋曰趣卽是有有能趣所趣故卽辨俗諦欲事不可得卽是明空中無能趣所趣故卽辨真諦云何當有趣非趣卽是辨中道當知三諦祇在一欲事耳今更廣釋令義易解云何一切法趣欲事是趣不過欲事爲法界故一切法之根本如初起欲覺已具諸法心麓不知漸漸滑利不能制御便習其事初試歇熱習之則慣餐啜叵忘卽便退戒還家求覓欲境覓不知足或偷或劫或偏或

質如是等種種求欲而生罪過若得此境大須供養
或偷奪求財或殺生取適若其富貴縱心造罪若其
貧窮惡念亦廣欲罪旣成適有此有則有生死應徧
受果隨在何道欲轉倍盛受胎之微形世世常增長
十二因緣輪轉無際當知一切法無不趣欲欲法界
外更無別法當知一切五蓋如上說者於初一念悉
皆具足欲爲因緣生法其義可見也云何欲法界空
外五塵求不可得內意根求不可得中間意識求不
可得內外合求不可得離內外求不可得過去欲緣
求不可得現在欲因求不可得未來欲果求不可得
橫豎求之畢竟寂靜欲卽是空欲空故從欲所生一

切法亦卽是空空亦不可得是爲觀空棄利鈍蓋也
旣識已心一欲一切欲卽識一切衆生亦復如是且
置餘道直就人道種種色像種種音聲種種心行種
種依報各各不同當知欲因種別無量一人因果已
自無窮何況多人一界如是況九法界一法如是何
況百法譬如對寇寇是勲本能破寇故有大功名得
大富貴無量貪欲是如來種亦復如是能令菩薩出
生無量百千法門多薪火猛糞壤生華貪欲是道此
之謂也若斷貪欲住貪欲空何由生出一切法門經
云不斷五欲能淨諸根如是觀時俗諦五蓋自然清
淨雖能如此未見欲之實性實非空亦復非假非假

故豈有無量非空故豈有寂然空及假名是二皆無
無趣無非趣無趣者利鈍兩番五蓋玄除無非趣一
番五蓋除得識中道又一番除無所斷破無所熏滅
而四番五蓋一念圓除破二十五有見欲實性名王
三昧具一切法是名圓觀棄於圓蓋如此法門名理
卽是作如此解名名字卽是初心此觀名觀行卽是
如上訶色卽淨眼根訶聲卽淨耳根訶香卽淨鼻根
訶味卽淨舌根訶觸卽淨身根棄五蓋卽淨意根六
根淨時名相似卽是三惑破三諦顯名分真卽是若
能盡欲蓋邊底名究竟卽是圓棄欲蓋既爾棄餘蓋
亦然○第四調五事者所謂調食調眠調身調息調

心如前所喻土水不調不住爲器五事不善不得入
禪眠食兩事就定外調之三事就入出住調之調食
者增病增眠增煩惱等食則不應食也安身愈疾之
物是所應食略而言之不飢不飽是食調相尼捷經
曰噉食太過體難迴動窳惰懈怠所食難消失二世
利睡眠自受苦迷悶難醒寤調眠者眠是眼食不可
苦節增於心數損失功夫復不可恣上訶蓋中一向
除棄爲正入定鄣故此中在散心時從容四大故各
有其意略而言之不節不恣是眠調相三事合調者
三事相依不得相離如初受胎一孺二命三識孺是
遺體之色命是氣息報風連持識是一期心主託胎

卽有三事三事增長七日一變三十八七日竟三事
出生名嬰兒三事停住名壯年三事衰微名爲老三
事滅壞名爲死三事始終不得相離須合調也初入
定時調身令不寬不急調息令不澀不滑調心令不
沈不浮調麤入細住禪中隨不調處覺當檢校調使
安隱如調絃入弄後不成曲卽知絃軫差異覺而改
之若欲出定從細至麤備如次第禪門也若能調凡
夫三事變爲聖人三法色爲發戒之由息爲入定之
門心爲生慧之因此戒能捨惡趣凡鄙之身成辦聖
人六度滿足法身此息能變散動惡覺卽成禪悅法
喜因禪發慧聖人以之爲命此心卽能改生死心爲

菩提心真常聖識始此三法合成聖胎始從初心終
至後心唯此三法不得相離云觀心調五事者如前
法喜禪悅爲食也初觀真諦所生定慧多爲入空消
淨諸法此是飢相法華云飢餓羸瘦體生瘡癬也第
二觀俗諦所生定慧多是扶俗假立諸法名爲飽相
故云歷劫修行恒沙佛法是二觀飢飽不調中道禪
悅法喜調和中適無二邊之偏是名不飢不飽云調
眠者空觀未破無明無明與空合沈空保住眠相則
多出假分別伏無明眠相則少今中道觀從容若斷
無明一切善法則無生處塵勞之儔是如來種不斷
癡愛起諸明脫若恣無明無上佛道何由得成經云

無明轉卽變爲明行於非道通達佛道無明性明性
無二無別豈可斷無明性更修明性耶不住調伏不
住不調伏卽是理觀調眠也合調三事卽爲三番大
經云六波羅蜜滿足之身調如此身今不寬不急大
品云樂說辯卒起是爲魔事不卒起亦是魔事卒起
者卒行六度是急卒放捨是寬不卒不寬是身調相
調息者以禪悅法喜慧命爲息如大品云般若非利
非鈍若鈍名爲澀若利卽名滑不鈍不利名息調相
調心者菩提心難得是爲沈菩提心易得名爲浮非
難非易是爲調相次約三觀調三事者以微妙善心
爲菩提心如前明四種菩提心若三藏通教爲斷結

入空以真爲證此心爲沈若別教化他出假分別藥
病廣識法門發菩提心此心爲浮若圓教觀實相理
雙遮雙照非空故不沈非假故不浮發如是心名爲
調相調身者通教斷惑明六度爲急別教出假分別
爲寬中道不依二邊爲不寬不急也調息者通教慧
命入空爲滑別教入假爲澀中道不依二邊爲不澀
不滑復次約三觀各各調者初觀止身息心爲急滑
沈次觀身息心爲寬澀浮若能中適卽成方便得入
真諦也第二觀止身息心爲急滑沈觀身怠心爲寬
澀浮能止觀中適則成方便發道種智見俗諦理云
中道止身息心爲急滑沈觀身息心爲寬澀浮若能

中適止觀從容卽成方便得入中道見實相理也
者善調三事令託聖胎如卽行心未有所屬應當勤
心和會方便智度父母託於聖胎豈可託地獄三途
人天之胎耶○第五行五法者所謂欲精進念巧慧
一心前喻陶師衆事悉整而不肯作作不殷勤不存
作法作不巧便作不專一則事無成今亦如是上二
十法雖備若無樂欲希慕身心苦策念想方便一心
決志者止觀無由現前若能欣習無厭曉夜匪懈念
念相續善得其意一心無異此人能進前路一心譬
舩舵巧慧如點頭三種如篙櫓若少一事則不安隱
又如飛鳥以眼視以尾制以翅前無此五法事禪尚

難何況理定當知五法通爲小大事理而作方便也
成論用四支爲方便一心爲定體若然者四禪皆有
一心一心無異云何判四禪之別今不用此若纓絡
云五支皆方便第六默然爲定體四禪俱有默然亦
難分別若毗曇用五法爲方便五支皆爲定體所以
有四禪通別之異一心爲通體初支爲別體故云覺
觀俱禪乃至捨俱禪別支與一心同起得簡一心有
深淺異釋論同此說今亦用之論文解五法者欲者
欲從欲界到初禪精進者欲界難過若不精進不能
得出如叛還本國界首難度故論云施戒忍世間常
法如客主之禮法應供給見作惡者被治不敢爲罪

或少力故而忍故不須精進今欲生般若要禪定
必須大精進身心急著爾乃成辦如佛說血肉脂髓
皆使竭盡但令皮骨在不捨精進乃得禪定智慧得
是三事衆事皆辦是故須大精進也念者常念初禪
不念餘事慧者分別初禪尊重可貴欲界欺誑可惡
初禪爲攀上勝妙出欲界爲厭下苦麓障因果合論
則有十二觀若依此言與外道六行同但外道專爲
求禪今佛弟子用邪相入正相無漏心修還成正法
是爲巧慧一心者修此法時一心專志更不餘緣決
定一心非是入定一心也復次欲者欲從生死而入
涅槃精進者不雜有漏名精一向專求名進念者但

念涅槃寂滅不念餘事巧慧者分別生死過患賢聖
所呵涅槃安樂聖所稱歎一心者決定怖畏修八聖
道直去不迴是爲方便而得入真復次欲者欲廣化
衆生成就佛法精進者雖衆生性多佛法長遠誓無
退悔念者悲心徹骨如母念子方便者巧知諸病明
識法藥逗會適宜一心者決定化他誓令度脫心不
異不二復次欲者如薩陀波喩欲聞般若不自惜身
命精進者爲聞般若故七日七夜閑林悲泣七歲行
立不坐不臥念者常念我何時當聞般若更無餘念
巧慧者雖有留難留難不能難如賣身魔不能蔽障
水更能刺血轉魔事爲佛事卽巧慧一心者決志不

移不復二念也復次重說欲者欲從二邊正入中道
不雜二邊爲精任運流入爲進繫緣法界一念法界
爲念修中觀方便名善巧息於二邊心水澄清能知
世閒生滅法相不二其心清淨常一能見般若也此
二十五法通爲一切禪慧方便諸觀不同故方便亦
轉譬如曲弄旣別調弦亦別若細分別則有無量方
便文繁不載可以意得今用此二十五法爲定外方
便亦名遠方便因是調心豁然見理見理之時誰論
內外豈有遠近大品云非內觀得是智慧非外觀非
內外觀不離外觀不離內觀及內外觀亦不以無觀
得是智慧今且約此明外方便也然不可定執而生

是非若解此意沈浮得所内外俱成方便若不得意俱非方便也

摩訶止觀卷第四下